

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx.xxxxx 2009-meersoq

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

Siunnersuutip aappassaaneerenerani saqqummiunneqartoq

Akileraartarnermut Akitsuusiisarnermullu Ataatsimiititaliaq suliarinninnermini ukuningga inuttarpoq:

Inatsisartunut ilaasortaq Niels Thomsen (siulittaasoq)
Inatsisartunut ilaasortaq Harald Bianco (siulittaasup tullia)
Inatsisartunut ilaasortaq Aqqualuaq Egede
Inatsisartunut ilaasortaq Karl Lyberth
Inatsisartunut ilaasortaq Aleqa Hammond
Inatsisartunut ilaasortaq Jens Imanuelsen

Siunnersuutip siullermeerneqarnera tunngavigalugu siunnersuut ataatsimiititaliamit misissorneqarpoq.

Siunnersuutip imarisaa

Aningaasarsianit akileraarutit pillugit inatsimmut allannguutissatut siunnersuutit sisamat siunnersuutip imarai:

- 1) Siullermik siunnersuutigineqarpoq aatsitassatigut pisuussutininik misissueqqaarnernut, misissueqqissaarnernut aammalu piaanermut atatillugu killilimmik akileraartussaaneq pillugu malittarisassanik eqqussineqassasoq inatsiseqartitsinikkut tunngavissat paasinarneruleknissaat siunertaralugu. Tamatumunnga ilanngullugu siunnersuutigineqarpoq aatsitassatigut pisuussutininik misissueqqaarnernut, misissueqqissaarnernut aammalu piaanermut atatillugu ingerlatsinerit aammalu tamatumunnga atatillugu inuit sulisut akileraartussaataanerit pillugu malittarisassanik eqqussineqassasoq.
- 2) Aappassaattut siunnersuutigineqarpoq akeqanngitsumik biileqartitaanerup akileraarusigaa-nerata annertussusiligaanera qaffaaffigineqassasoq. Tamatumuunakkut nalinginnaasumik atugaalluurtumik sulisunut ajunngitsorsiarititaasumik, biilimik atugassinneqarnermi aningaasatigut iluaqutissinneqarnermut ersersitsinerusumik ullutsinnullu naleqqunnerusumik, akileraarusiinissaq aammalu pisortat akileraarutitigut isertitaannik pisariaqartumik annertusaanisaq eqqarsaatigineqarput.
- 3) Pingajussaattut selskabinik nalikillilerissutigisassanik atunngisaqartunik nioqquteqarsinnaanerup pakkersimaarneqarnissaanik siunnersuut siunertarpoq. Kalaallit Nunaanni akileraar-

tarnermi nalikillilerinermut tunngasutigut malittarisassat nunarsuarmi nunanut allanut saniliullugit ammanerujussuupput orniginartuullutillu. Akileraartarnermi nalikillilerinermut Kalaallit Nunaanni malittarisassat nunarsuarmi nunanut allanut assersuussinermi aningaasaliinissamat ussasaarinninnermut ilapittuutaapput. Allanguutissat siunnersuutigineqartut tamatuma allangortinnissaanik siunertaqanngillat, taamaallaalli malittarisassat atuuttuusut iluarinangitsumik sunniutaat illuatungilerniarneqarlutik.

- 4) Sisamaattut siunnersuutigineqarpoq nunani allamiut sulisitsisuisa akissarsianik, siulersuisut akissarsiaannik allanillu tunniussinernut atatillugu akileraarutit A-nik unerartitsinissamat nalunaarutiginninnissamullu pisussaaffeqarnerat sakkortusineqassasoq. Tamanna pissalluni inunnit selskabiniillu, Kalaallit Nunaanni eqqartuussiveqarfimmi najugaqanngitsunit akissarsianik, siulersuisut akissarsiaannik allanillu tunniussinertit, assigisaannik tunniussinertuulli A-nik aningaasarsianngortinneqarnerisigut. Tamatumalu saniatigut unerartitsinissamat pisussaaffeqartut akileraarutit A-nut unerartitat pillugit nalunaarusiamik Kalaallit Nunaanni suliarisassagaat piumasarineqarluni, taamatullu paasissutissat suliamut attuumassuteqartut maani nunami uninngatinneqartassasut, unerartitsisussaataitap nunami angerlarsimaffigisaa Kalaallit Nunaatalu akornanni Kalaallit Nunaannut akileraarutitik unerartitsineq pillugu isumaqatigiissuteqanngippat.

Siunnersuutip Inatsisartuni siullermeerneqarnera

Aatsitassarsiornermi inuussutissarsiutinilu allani pisariaqartitsinermut akileraartarnermi inatsisip aaqqinneqarnissaanik siunnersuutikkut siunertarineqartut siullermeerinermi partiinit tamanit taper-serneqarput, tamatumani immami kultbrintisiornermik akileraarusiinissamat Kalaallit Nunaata periarfissaqarnera erseqqissarneqarluni, tak. qulaani 1).

Taamatuttaaq akileraarutitigut nalikilliliinerit pillugit maleruagassanik atonerluinissap pinaveersimatinneqarnissaa pillugu siunnersuutip ilaa taperserluarneqarpoq, tak. qulaani 3), soorluttaaq siunnersuutip ilaa sulisitsisut nunanit allaneersut akileraarutitik A-nik unerartitsinissamat nalunaarutiginninnissamullu pisussaaffeqarnerisa sukateriffigineqarnissaanik siunertaqartoq taperserluarneqar-toq, tak. qulaani 4).

Siunnersuummi akeqanngitsumik biileqartitaanerup akileraarusigaanerata annertussusiligaanerata iluarsivigineqarnissaannut tunngasoq **Inuit Ataqtigiit Demokraatillu** taperserpaat, tak. qulaani 2).

Akeqanngitsumik biileqartitaanerup akileraarusigaanerata annertussiligaanerata qaffaavigineqarnissaa **Siumumit** aamma taperserneqarpoq, ernummatigineqarlunili ilaatigut portørit, qatserisartut politiillu akileraarutitik qaffaanermi aamma eqqugaanissaat, tamanna Siumut malillugu inuiaqatigiin-nut pitsaanngitsumik kinguneqarsinnaavoq, tassa inuit taakku suliffiup avataani biileqarsinnaajun-naarnerannik biileqarusukkunnaarnerannilluunniit tamanna kinguneqassappat.

Akeqanngitsumik biileqarneq qaffasissumik akileraarusigaareersoq qaffaaqqinnerullu kingunerisin-naagaa inuit aaqqissuussinermik taamaattumik atuerusukkunnaarnerat, tamannalu Nunatta Karsiata isertitassaraluisa annaaneqarnerannik kinguneqarsinnaasoq **Atassutip** oqaatigaa.

“Akeqanngitsumik biileqartitaanneq” aamma “atorfimmut atatillugu biileqartitaanneq” immikkoor-tissallugit pingaaruteqartoq siullermeerinermi **Naalakkersuisut** oqaatigaat, tassa atorfimmut atatil-

lugu biilerisat akileraarusigaaneq ajormata, taamaattumillu akileraarutininik qaffaanermut ilaatinneqaratik.

Akileraartarnermut Akitsuusiisarnermullu Ataatsimiititaliap siunnersuummik suliarinninerra

Akeqanngitsumik biileqartitaanerup akileraarusigaanerata annertussiligaaneraniq qaffaanissamik siunnersuutigineqartumut atatillugu ataatsimiititaliamit oqaatigineqassaaq tamanna aningaasarsianit akileraarutit pillugit Inatsisartut inatsisaanni nr. 12, 2. november 2006-meersumi maleruagassiuuneqarmat, taassani § 19-imi ima allassimasoqarluni:

§ 19. Aningaasarsiat akileraaruteqaataasussat naatsorsorneranni biilip, akileraartartup sulisitsisuminit atorfinitsitaanerminut allatulluunniit ikiuulluni sulinissaminik isumaqatigiissuteqarnerminut atatillugu privatimik atorsinnaasaata nalinga ilanngunneqassaaq, tak. Imm. 2-miit 8-mut. Tamanna aamma atuuppoq inunnut siulersuisuni, ataatsimiititaliani, kommissionini, siunnersuisooqatigiinni, immikkut qinikani allatulluunniit ataatsimoorfiusuni, tamatumani ilanngullugit Naalakkersuisunut, Inatsisartunut kommunalbestyrelsinullu ilaasortatut qinerneqarsimasunut tamakkununnugaluunniit ikiortaasunut.

Imm. 2. Illoqarfik biilip privatimik atorneqarfia 75.000 kvadratmeterisut annertutigisumik annertunerusumulluunniit aqqusineqarpat, biilip imm. 1-imi pineqartup akileraarutitigut nalinga ukiumut 40.000 koruuninik annertussusilerneqassaaq.

Imm. 3. Illoqarfik biilip privatimik atorneqarfia 25.000 kvadratmeterinik 75.000 kvadratmeterillu akornanni annertutigisumik aqqusineqarpat, annertussusiliussaq imm. 2-mi taaneqartoq 20.000 koruuninut appartinneqassaaq.

Imm. 4. Illoqarfik biilip privatimik atorneqarfia 25.000 kvadratmeterit inorlugit annertutigisumik aqqusineqarpat, annertussusiliussaq imm. 2-mi taaneqartoq 10.000 koruuninut appartinneqassaaq.

Imm. 5. Biilit sulliviittut aqqissukkat biilinillu immikkut sanaajusunik allanik privatimik atuineq angissusiliussat imm. 2-miit 4-mut taaneqartut affaanut annertussusilerneqassaaq. Biilit tamaattut sulisitsisup allaganngorlugu peqqussuteqarneratigut angerlarsimaffiup suliffiullu akornanniinnaq atorneqartarpat annertussusiliussat imm. 2-miit 4-mut taaneqartut sisamararterutaannut annertussusilerneqassapput.

Imm. 6. Lastbiilininik 4 tonsit sinnerlugit oqimaassusilinnik kiisalu biilininik tankiminni usisartunik, krani-nik kivitsissutinik aammalu eqqaasut biiliininik privatimik atuineq akileraaruserneqartussaangilaq.

Imm. 7. Biilit ukiup ilaannaani atugassaritinneqarpat nalingat akileraaruteqaataasussaq ullunik biilininik atuiffiunngitsunik ilanngarlugi appartinneqassaaq. Akileraartussaataitaasooq biilit atorsinnaanerinit akiliuteqarpat, nalinga akileraaruteqaataasussaq aningaasanik akiliutigineqarsimasunik ilanngarlugi appartinneqassaaq.

Imm. 8. Sulisitsisup allaganngorlugu peqqussutigisimappagu akileraartussaataitaasooq suliartoqquneqarnermini biilininik atuissasoq, akileraartussaataitaasup angerlarsimaffimmi suliffimmi akornanni biilininik atuinera privatimik atuineranut isigineqassanngilaq, aatsaalli akileraartussaataitaasup suliartoqquneqarsinnaanermi nalaani biilit privatimik atugassarinngippagit.”

Imm. 2,3 aamma 4-mi aningaasartaliussat annertussusaannik allannguinissaq siunnersuummi kisimi pineqarpoq. Tamatuma saniatigut aalajangersakkami allannguisoqanngilaq.

Imm. 5 pillugu inatsimmut nassuiaatini ima allassimasooq ataatsimiititaliap maluginiarpa:

” Sullivimmi biilit imatut paasineqassapput biilit matoqqasut aalajangerlugit ikkussakanik ilitsivillit aammalu aalajangikkanik sakkunut ilitsivillit. Biilit immikkut ittut allat assersuutigalugu tassapput ikiuiartorluni biilit atorneqartartut tamarmik, ilisiartortut qamutaat il.il. Biilit ikiuiartorluni atorneqartartut tassapput politiiut suliner-mi, inunnik annaassiniarnermi, ikualattoqarnerani, mingutsitsisoqarnerani, angallannikkut ajutoortoqarnerani anner-

tuumik ajutoortoqarnissaanik pinngitsoortitsiniarnermi atorreqartartut, biili ataatsimik arlalinnilluunniik tungu-jortunik ikittaartoqarpat aammalu ikiuiartorluni assigiinngitsunik marlunnik nipilimmik siggartaateqarpat. Imm. 5-imi akimut appasinnerusumut piomasagaataalluinnarpoq biilit taakku taamaallaat angerlarsimaffiup suliffiullu akornanni atorreqassasut. Sulisoq ukiumut ataasiaannarluniluunniit biilit taakku inuttut atorpagit taamatut biilnik ingerlaneq imm. 2-mi, 3-mi imaluunniit 4-mi ukiumut akit malillugit akileraaruserneqassaaq.”

Taamaalilluni sullivimmi biilit aasersuutigalugulu biilit ikiuiartorluni atorreqartartut privatimik atorreqarunik aallaavittut isigalugu aningaasat imm. 2-mi, 3-mi 4-milu taaneqartut affaannik akileraarusigaassasut imm. 5-imi tassungalu nassuiaatini takuneqarsinnaavoq. Tamatumunnga pissutaa-voq biilit imm. 5-imi taaneqartut nalinginnaasumik ima ilusiligaasarmata privatimik atorreqarnisaminnut naleqqunnatik.

Tamatuma saniatigut imm. 5-imi oqaaseqatigiit aappaat naapertorlugit sulisitsisup allaganngorlugu peqqusineratigut biili angerlarsimaffiup suliffiullu akornanni angallassissutituinnaq atorreqarpat akileraarutaasartut sisamararterutaannangortinneqassapput. Tamatumani ilaatigut pineqarput biilip sanaartorfiusumi assigisaaniluunniit unnuaq naallugu nakkutigineqarani uninnganissaa pinngitsoor-niarlugu biilip angerlaannissaanik sulisitsisup sulisuni peqquppagu. Biili sulisup privatimik atorpa-gu imm. 5-imi oqaaseqatigiit siulliit malillugit akileraarusiisoqassaaq, tassa “affarmik akileraarusii-soqarluni”.

Biilnik qatserisartunit, politiinit peqqissaanermillu suliaqartunit atorreqartut akileraaruserneqartar-nerat pillugu Inatsisartut Suleriaasianni § 36, imm. 1 naapertorlugu apeqqummut Naalakkersuisut akissutaat aamma innersuussutigineqarpoq. Akissut ilanngussaq 1-itut ilanngunneqarpoq.

Aggersarneqarsinnaalluni pigaartuuneq / Atorfimmut atatillugu biilit

“Atorfimmut atatillugu biilit” akileraartarnermut inatsisini taaguutitut atorreqanngitsoq, biilnulli § 19, imm.8-mi pineqartunut nalinginnaasumik taaguutaasoq ataatsimiititaliap maluginiarpaa. Tassu-nga nassuiaatini ilaatigut allassimavoq:

”Sulisup aggersarneqarsinnaalluni pigaartuuneranut atatillugu angerlarsimaffiup suliffeqarfiullu akornanni biili-mik ingerlaneq akileraaruserneqassanngilaq. Aggersarneqarsinnaalluni pigaartuusoqartarpoq sulisoq pigaartuu-nermini angerlarsimaffiminiit sumiiffinnut "assigiinngiiaartunut" siumut ilisimaneqariinngitsunut aggersarne-qarsinnaagaangat.

Imm. 8 malillugu aggersarneqarsinnaalluni pigaartuugaanni, aallaaviusumik piffissap nalinginnaasumik suliffiu-sup avataani angerlarsimanissamut pisussaaffilerneqarsimasoqassaaq kiisalu aggersarneqarsinnaalluni pigaartuu-nerlut immikkut akissarsiaqartoqassalluni, apeqqutaatinnagu aggersaaneqarnersoq aggersarneqannginnersorluun-niit. Inuk attaveqarfigineqarsinnaasoq piffisap nalinginnaasumik suliffiusup avataani aggersarneqartoq, sulisitsi-sup illuutaani ajutoortoqartillugu tillinniartoqartilluguluunniit imm. 8 malillugu aggersarneqarsinnaalluni pigaar-tuusutut isigineqanngilaq.

Sulisoq aggersarneqarsinnaalluni pigaartuusoq inuttut inuunermini killiliiffigineqavissimassaaq. Assersuutigalu-gu sulisoq piffissami aggersarneqarsinnaanermini qasuersimalluni aalakoornanilu suliaartorsinnaasariaqarpoq. Aammattaq pisussaaffeqavittoqassaaq. Oqarasuaatikkut attaveqatigiittarnermi, sulisup suliaortussaataitaa-nerminik allamut ingerlatitseqqiiginnarsinnaanera piviusutut isigineqanngilaq ...

Angerlarsimaffittut paasineqassaaq sumiiffik aalajangersimasumik siniffigisartagaq, suliffimmut atatillugu anga-laneq, napparsimaneq assigisaalluunniit pissutigalugit tassaniinngikkaanni siniffigineqartartoq aammalu pigisa-nik inissivigineqarnikoq.

Sumiiffiit "assigiinngiiaartut" ilisimaneqariinngitsut tassaapput illoqarfimmi suliffiugallartunut siumoorluni ili-simanngisanut aggersarneqarfiusinnaasut. Apeqqutaanngilaq sumiiffiit taakku ilisimaneqarnerisut, kisiannili ima-

tut amerlatigissapput sumiiffinnut taakkununga assigiinngiaarpassuarnut aggersarneqarsinnaaneq siumut ilisi-
maneqarsinnaanani. Nalinginnaasumik suliffik oqaatsimut sumiiffinnut "assigiinngiaartut"-nut ilaangilaq,
aammattaq sulisitsisoq illoqarfimmi arlalinnik adresseqaraluarpalluunniit.

Akileraaruteqannginnissamut piunasaqaataalluinnarpoq aggersarneqarsinnaalluni pigaartuunermut atatillugu su-
lisup angerlarsimaffiup suliffiullu akornanni biilernissaanik sulisitsisup allakkatigut pisussaaffiliisimanissaa kii-
salu allakkatigut aalajangersarneqarsimassalluni sulisoq aggersarneqarsinnaalluni pigaartuunermi inuttut biili-
nik namminermut tunngasumik allamut ingerlassanngitsoq. Sulisoq ukiumut ataasiaannarluniluunniit biilit taakku
inuttut atorpagit taamatut biilnik ingerlaneq imm. 2, 3 aamma 4-mi ukiumut akit tunngavugalugit akileraaruser-
neqassaaq".

Sulinermtut atatillugu biilerisat aggersarneqarsinnaalluni pigaartuunermut atatillugu atorneqartut
privatimik ingerlaarnermtut atorneqanngikkunik akileraarusiigaaneq ajortut ataatsimiititaliamit malu-
giniarneqarpoq. Biili privatimik ingerlaarnermtut atorneqarpat imm. 2, 3 aamma 4 naapertorlugit
akileraarusiisoqassaaq. Ikiuiartorluni biili atorneqartartoq imaluunniit sullivimmi biili pineqarpat
imm. 5 malillugu akileraarusiisoqassaaq, tassa "affarmik akileraarusiisoqarluni".

§ 19, imm. 1-5 naapertorlugit biilnik atuinerup aningaasatigut kinguneri

Akeqanngitsumik biileqartitaanerup akilerartarnermi nalinga kingullermik Inatsisartut inatsisaati-
gut nr. 9-ikkut, 29. oktober 1999-imeersukkut aqqiivigineqartoq ataatsimiititaliap maluginiarpaq.
2000-imi januarimiit 2009-mi januarimut akit nalinginnaasumik 28 procentip missaanik qaffassi-
mapput aammalu ilaatigut qamutinut motoorilinnut akunnattumik oqimaassusilinnut akilerarut
2004-mi 1.550 koruuninik ukiumut qaffanneqarluni.

Akilerartarnermi procenti 42-miitillugu siunnersuutigineqartoq malillugu akeqanngitsumik biile-
qartitaanermtut naligititaasoq 60.000 koruuniuppat akilerarutitut akiliutissaq ukiumut 25.200 ko-
ruuniussaaq. Assersuutigalugu nammineq biilerisamut pisiarinerani 175.000 koruuneqartumut (a-
kunnattumik oqimaassusilik) erniaqartitsineq 9%-iuppat ukiunilu 15-imi nalikillilerinermi ernialer-
suinermtut nalikillilerinermullu aningaasartuutit ukiumi siullermi 27.500 koruunit missigissavaat.
Tamatuma saniatigut orsussamut, akilerarutitut, aserfallatsaaliinermtut sillimmasiinermtullu ani-
ngaasartuutit aamma akilerneqassapput. Akilerartussaataitaasunut amerlasuunut taamaasilluni suli
pilerinarnerussaaq sulisitsisumit biilimik atugassinneqarnissaaq namminerisamik biilitaarnissamin-
ngarnit.

Assersuutitut naatsorsuinerit:

Illoqarfiit 75.000 kvadratmeterimit takinerusunik aqqusinillit:

(Taakku ullumikkut tassaapput: Qaqortoq, Narsaq, Nuuk, Sisimiut, Aasiaat aamma Ilulissat)

Akeqanngitsumik biileqartitaanerup nalinga 60.000 kr.-iuppat atuisoq qaammammut 2.100 kr.-inik
aningaasartuuteqassaaq (siusinnerusukkut 1.400 kr.)

Imm. 5-imi oqaaseqatigiit siulliit naapertorlugit akeqanngitsumik biilerisap (sullivimmi biili il.il.)
nalinga $60.000/2 = 30.000$ kr.-iuppat atuisoq qaammammut 1.050 kr.-inik aningaasartuuteqassaaq
(siusinnerusukkut 700 kr.)

Imm. 5-imi oqaaseqatigiit aappaat naapertorlugit biilerisap nalinga $60.000/4 = 15.000$ kr.-iuppat
atuisoq qaammammut 525 kr.-inik aningaasartuuteqassaaq (siusinnerusukkut 350 kr.)

Illoqarfiit 25.000 aamma 75.000 kvadratmeterit akornanni takissusilinnik aqqusinillit:

(Taakku ullumikkut tassaapput: Nanortalik, Ivittuut, Paamiut, Maniitsoq, Qasigiannuguit, Qeqertarsuaq, Uummannaq, Upernavik aamma Tasiilaq)

Akeqanngitsumik biileqartitaanerup nalinga 30.000 kr.-iuppat atuisoq qaammammut 1.050 kr.-inik aningaasartuuteqassaaq (siusinnerusukkt 700 kr.)

Imm. 5-imi oqaaseqatigiit siullit naapertorlugit akeqanngitsumik biilerisap (sullivimmi biili il.il.) nalinga $30.000/2 = 15.000$ kr.-iuppat atuisoq qaammammut 525 kr.-inik aningaasartuuteqassaaq (siusinnerusukkt 350 kr.)

Imm. 5-imi oqaaseqatigiit aappaat naapertorlugit biilerisap nalinga $30.000/4 = 7.500$ kr.-iuppat atuisoq qaammammut 262,50 kr.-inik aningaasartuuteqassaaq (siusinnerusukkt 187,25 kr.)

Illoqarfiit 25.000 kvadratmeterit ataallugit takissusilinnik aqqusinillit:

Taakku ullumikkut tassaapput: Kangaatsiaq, Qaanaaq aamma Illoqqortoormiut)

Akeqanngitsumik biileqartitaanerup nalinga 15.000 kr.-iuppat atuisoq qaammammut 525 kr.-inik aningaasartuuteqassaaq (siusinnerusukkt 350 kr.)

Imm. 5-imi oqaaseqatigiit siullit naapertorlugit akeqanngitsumik biilerisap (sullivimmi biili il.il.) nalinga $15.000/2 = 7.500$ kr.-iuppat atuisoq qaammammut 262,50 aningaasartuuteqassaaq (siusinnerusukkt 187,25 kr.)

Imm. 5-imi oqaaseqatigiit aappaat naapertorlugit biilerisap nalinga $15.000/4 = 3.750$ kr.-iuppat atuisoq qaammammut 131,25 kr.-inik aningaasartuuteqassaaq (siusinnerusukkt 87,50 kr.)

Siuliani allassimasut tunngavigalugit ataatsimiititaliamit oqaatigineqassaaq akeqanngitsumik biileqartitaanermit akileraarutit annertussusiligaanerisa qaffanneqarnissaanik siunnersuutikkut biilinnik taama atuisut nammineq privatimik biileqarnermini aningasartuutigisassaminnit annerusunik artukkerneqassanngitsut.

Illoqarfinni 75.000 kvadratmiiterit ataallugit takissusilinnik aqqusineqartuni biilinnik nammineq pigisaqartut illoqarfinni takinerusunik aqqusineqartuni biilit atornerqarnerannut aningaasartuutaasartut annertoqataannik aningaasartuuteqartarnerat eqqarsaatigigaanni akileraarusiineq suli annikitsuararsuuvoq.

Ataatsimiititaliamit aamma oqaatigineqassaaq biilit aggersarneqarsinnaalluni pigaartuunermit taamaallaat atornerqartut inatsimmi § 19, imm. 8 naapertorlugu akileraarusigaannginnerat allanngortineqanngimmat.

Taamaattoq aggersarneqarsinnaalluni pigaartuunermit akileraarutinnik akiliisussaataitaassanngikkaanni piumasagaatit sakkortummata ataatsimiititaliamit oqaatigineqassaaq. Minnerunngitsumik imm. 8-mut nassuiaatini oqaasertaliussat uku ”... aallaaviusumik piffissap nalinginnaasumik suliffiusup avataani angerlarsimanissamat pisussaaffilerneqarsimasoqassaaq kiisalu aggersarneqarsinnaalluni pigaartuunertut immikkut akisarsiaqartoqassalluni, apeqqutaatinnagu aggersaaneqarnerseq aggersarneqannginnersorluunniit” kiisalu ”Sulisoq aggersarneqarsinnaalluni pigaartuusoq inuttut inuunermini killiliiffigineqavissimassaaq” sakkortuutut isigineqartariaqarput. Akileraartinneqarnissaq pinngitsoorniaannarlugu aggersarneqarsinnaalluni pigaartuusarnermik pilersitsioqarnissaa pinngitsoortinniarlugu tamanna pisariaqarsinnaavoq.

Tassunga atatillugu ataatsimiititaliamit oqaatigineqassaaq assersuutigalugu sulisup niuerniarnissaa, paaqqinnittarfinnut meeqqaminik aallernissaa assigisaanilluunniit iliornissaa piumasaqaatit taama sakkortutiginerisa ajornartissammassuk, taamaaliernerluunniit sulinermut atatillugu biilerisat ator-nagit ingerlanneqaralarpat. Taamaalillunilu kisimiittut atorfinnik aggersarneqarsinnaalluni pigaar-tuusarnermik ilaqartumik suliffeqarnissaat ajornarsisinnaavoq ajornakusoorsinnaalluniluunniit.

§ 19, imm. 8-mi oqaasertaliussat; ” ... Sulisitsisup allaganngorlugu peqqussutigisimappagu akileraartussaataa-soq suliartoqquneqarnermini biilnik atuissasoq ...”, kiisalu nassuiaatinit siuliani issuagaq ima paasineqar-sinnaapput ”peqqussut” taamaattoq suliartoqquneqarsinnaanerup pisarissersuutaanera pissutigalugu sulisup tamatumunnga naapertuuttumik qaffasinnerusumik akissarsiaqartitaaneramik kinguneqartoq. Nalinginnaasumilli tamanna pineq ajorpoq sulisitsisullu inatsimmik sukangannginnerusumik atuine-ratigut ajornartorsiut ”aaqqinneqartarpoq”, taamaalillunilu sulisoq assersuutigalugu niuerniarsinnaa-sarluni. Taamatulli ”pisariinnerusussaq pillugu paasinninnerit” inatsimmik tunngaveqanngillat.

Inatsimmi tunngavissat qaangerlugit sulisitsisut assigiinngitsut inatsimmik sukangannginnerusumik paasinninnermikkut inatsimmik nalinginnaasumik saneqqutsisarsimappata tamanna assut ajornar-torsiutitaqartutut ataatsimiititaliamit isigineqarpoq. Peqatigisaanillu aaqqissuussineq oqartussaasunit pisariaqarneratut nakkutigineqanngippat tamanna ajornartosiutitaqartutut ataatsimiititaliamit isigi-neqarpoq.

Taamaattumik aggersarneqarsinnaalluni pigaartuusarneq pisariitsumik ator-neqarsinnaasunngorlugu tamatuma peqatigisaanik akileraarnaveersaarnissaq anguniaannarlugu aggersarneqarsinnaalluni pigaartuusarnermik aaqqissuussisalernissaq ammaatinngikkaluarlugu inatsimmik allannguinnissamut periarfissat Naalakkersuisunit misissorneqarnissaat ataatsimiititaliamit innersuussutigineqarpoq. Assersuutigalugu atorfinnut atatillugu biilerisat pigaartuutilluni soorlu niuerniarnermut allanillu ”sulinermut attuumanngitsunut” ator-neqarsinnaanerannik ajornartitsinnnginnissaq isumaliutigineqar-sinnaavoq, tamatumani biilit sulisumit pigaartuusumit taamaallaat ator-neqarsinnaanissaat tunnga-vissaatinneqassalluni.

Akileraartarnermut Akitsuusiisarnermullu Ataatsimiititaliap inassuteqaataa

Siuliani oqaaseqaatit siunnersuummillu siullermeerinermi oqaatigineqartut tunngavigalugit siunner-suut **akuerineqassasoq Akileraartarnermut Akitsuusiisarnermullu Ataatsimiititaliap** inassuti-gaa.

Taama oqaaseqarluni Akileraartarnermut Akitsuusiisarnermullu Ataatsimiititaliap siunnersuut Inat-sisartunit aappasaaniigassanngortippaa.

Niels Thomsen
Siulittaasoq

Harald Bianco

Aqqaluaq Egede

Aleqa Hammond

Jens Imanuelson